

RIJEČ UREDNIKA

Elmedin MURATBEGOVIĆ

Poštovani čitaoci,

Dvobroj koji slijedi po mnogo čemu je specifičan. Njegov sadržaj obiluje empirijskim temama, tačnije temama koje su pored teorijskih postavki i preliminarnih hrestomatskih sekundarnih analiza na veoma precizan način potkrepljene primarnim, originalnim i empirijski podržanim informacijama. Ovakav trend svakako jača naš časopis, podižući standard i kriterij za naredne autore koji imaju namjeru kod nas objavljivati svoja istraživanja.



Cjelokupan opus dvobroja mogao bi se virtuelno podijeliti na tri dijela.

Prvim dijelom bi se mogli smatrati izvorni naučni radovi iz primarne kriminalističke nauke, putem kojih su osvijetljena dva fenomena tradicionalne kriminalistike. Radi se o radu koji kritički analizira otkrivanje, razjašnjavanje i dokazivanje krivičnih djela putem alibija, kao specifičnog materijalno-personalnog dokaza u praksi policije, tužilaštva i sudova Kantona Sarajevo. Pored navedenog, kao prirodni nastavak objavljujemo i rad koji kvalitativno analizira ulogu vještačenja u donošenju adekvatne sudske odluke. Na ovaj način, praktično započinjemo sa održivim kriminalističkim istraživanjima u Bosni i Hercegovini, tačnije polako se odvajamo od tradicionalnih neempirijskih deskriptivnih i hrestomatskih tekstova koji svojom suhoparnosti usporavaju razvoj kriminalistike kao svjetski aktuelne i dinamične nauke.

Drugi, virtuelni, dio obrađuje problematiku uloge međunarodne organizacije kriminalističke policije u provođenju postupaka izručenja za teška kršenja međunarodnog humanitarnog prava. Značaj ove teme je nesporan, kako stručnoj, tako i široj javnosti, jer smo u posljednjih nekoliko godina svjedoci velikog broja nestručnih analiza i komentara na teme koje su upravo obrađene u ovom naučnom

II	<i>Kriminalističke teme</i> Časopis za kriminalistiku, kriminologiju i sigurnosne studije Godište X, Broj 3-4, 2010. ISSN 1512-5505
----	---

radu. Eminentni autori, konkretan i jasan cilj kao i sam stil pisanja, zasigurno će umnogome olakšati svim zainteresovanim za pomenutu temu da prodube svoje spoznaje i otklone eventualne dileme.

U trećem dijelu, spontano se pojavljuju i novi mladi autori koji dolaze iz redova studenata postdiplomaca. Upravo stoga, preporučujemo i ovaj stručni rad "prvijenac" jedne takve autorice koja pravi prikaz i pregled prakse geografskog profiliranja izvršilaca krivičnih djela.

Na kraju, nadamo se da ćete u ovom dvobroju pronaći nešto novo što će Vam koristiti, što će Vas u krajnjem slučaju animirati da i sami nešto napišete i objavite u našem časopisu *Kriminalističke teme*.

S poštovanjem,

Sarajevo, 20.08.2011.

Murat begović Elmedin